

東
華
續
錄

東華續錄

咸豐八十三

臣王先謙敬編

臣陶濬宣恭校

九月癸酉朔諭內閣恭親王奕訢第一子著命名載澂○諭前因浙江衢州告警張芾飭周天受等閒道馳援迨全境肅清降旨將張芾賞戴花翎茲據奏稱墨經從戎惟當力圖報稱且周天受被劾之款猶奉旨查辦未敢濫竊寵榮益增罪戾請將前賞花翎撤銷等語此次張芾分兵援浙著有成效卽周天受亦經賞還提督銜朕權衡賞罰功罪分明所有張芾前賞花翎著毋庸撤銷○都興阿李續賓奏皖賊麇聚太湖狡悍異常糾眾不下三萬嬰城固守加增城牆城外濬濠築壘壘外築卡又於東北路二十里之楓香鋪四十里之小池驛各築壘三座於東路五十餘里之黃泥港

地方修築大壘鑄礮聚糧布置極爲嚴密臣等籌商欲攻城必先

破壘七月二十八日臣都興阿派多隆阿於八里岡出隊牽制城

賊臣李續賓飭副將趙克彰等分五路出攻東岸卡壘臣親督湘

中湘右營及親兵等營分五路攻城該逆先於壘中出七八千人

朱希廣迎頭衝擊趙克彰等自山內突出橫鈔賊遂敗潰約斃千

餘名生擒五十六名其時李續燾等均乘勢攻毀各卡斃賊七八

百名復偪攻大壘諸弁勇登陴數次被傷復墜未卽攻入八月初

一二等日臣都興阿飭參將石清吉等營進紮城南賊乘營壘未

成卽以大隊攻撲石清吉等整隊迎擊該逆敗退追至河邊斃賊

數百名臣李續賓率各營偪城之東面及西北駐紮初六日飭李

續燾等攻毀樞香鋪之賊壘初九日仍飭李續燾等擊破小池驛

賊壘前後約殺賊七八百名其東山頭南首該逆乘夜復修新壘

初十日

臣

都興阿飭石清吉等分路並進馬隊隨後策應

臣

李續

賓飭龔勝日等協力進攻斃賊約七百餘名將各壘平毀十二三

等日各營疊次出隊誘賊出戰賊匿不出十五日飭多隆阿等將

大礮密運山頭謝承祐等營由西北面攻城李續燾等營分攻東

岸下壘

臣

率多隆阿等營先轟東山迤南賊壘該逆專防前面不

料大隊由山後鈔襲紛紛墮濠我軍前後兜殺殆盡各營遂乘勢

攻東岸浮橋開化勝勇繞道梟水攻河西賊壘鏖戰逾時飛虎三

營及各起馬隊由西南兩路上下夾攻賊遂潰敗東門城賊出援

亦經石清吉等截擊合計殺賊三千餘人鮑超等復合兵攻東山

頭第一大壘該逆四面固守我軍搬運柴薪木板堆積壘邊諸勇

奮身肩累而上盡殫壘賊無一得脫中有黃袍賊目十餘人僞印

累累奪獲槍礮等件無算

臣

等知賊膽已寒急飭各營併力攻擊

鮑超等進攻第二壘周寬世等進攻第三壘臣等復親督石清吉

李存等分段攻城署太湖縣知縣蔡鏐亦率團勇隨後接應各營
輪番疊攻二更時火箭入城中然燒藥局煙燄噴烈西北二面各
勇奮呼登城賊紛紛由東南兩門突圍逃竄二壘之賊亦拌命衝
出各路集團追殺餘匪亂竄乘四山翻越各營弁勇與多隆阿等
馬隊分投追殺五十餘里計共斃賊五六千名遂將太湖縣城收
復十八日臣李續賓派趙克彰等進紮小池驛復派保慶等馬步
十四營進攻黃泥港我軍分路猛進力撲該逆越牆逃逸約殺斃
千餘人奪獲大礮四十七尊贏馬軍械無數該逆尙屯集石牌及
潛山縣臣等共商乘勢力擣節節掃蕩然後分兵下趙舒桐赴援
廬州上諭安徽太湖縣城溪山險阻逆賊踞爲要害將軍都興
阿布政使李續賓分督兵勇平毀各卡進攻各壘當將太湖縣城

克復仍著該將軍等督率諸軍將竄屯石牌及潛山縣節節掃蕩並分兵下趨舒桐赴援廬州○諭軍機大臣等勝保奏留兵防剿懷鳳並拔營南剿赴滁受撫請飭袁甲三等專顧北路各摺片所籌尙合機宜定遠池河該大臣均已派員帶兵前往其懷遠逼近賊壘酌留龍澤厚等督兵駐紮遊擊唐玉輝等堵剿鳳陽之賊勝保已拔隊南征與翁同書會商攻復廬州懷鳳各軍仍由該大臣兼顧袁甲三等專顧徐宿捻匪以固北路藩籬至李兆受投誠一事果能獻出滁城於皖北軍務有益況見在浦口失守羣賊東趨德興阿軍營退守六合情形甚爲喫重勝保此行可諭令李兆受乘此多事之秋勦賊立功必膺重賞看其能否卽獻滁城並爲勝保前驅誠心效順見在徐州竄匪已入豫東二省雖經團勇擊退而匪蹤奔突靡常實有防不勝防之患勝保旣責成徐廣縉調度

懷鳳軍務並仍自行兼顧袁甲三專力埽除徐宿捻匪毋煩南顧更屬得力勝保與袁甲三雖各專責成仍能統籌緩急不分畛域所謂師克在和朕實有厚望焉將此由六百里各諭令知之○諭張芾奏皖南軍情緊急請飭調統兵大員回防協剿一摺福建賊匪回竄江西復由德興東犯皖南浮梁之賊亦屢圖內犯婺祁密邇賊氛徼防萬分喫重該處專恃總兵江長貴一人調度恐有顧此失彼之虞總兵周天受久在皖省情形熟悉著胡興仁卽飭該總兵統率所部兵勇回徽防剿惟閩省建郡亦當攻剿喫緊之時著卽飛咨曾國藩慶端飭令李定太饒廷選迅速剿辦毋稍鬆懈將此由六百里諭令知之○諭扎拉芬奏會議業有就緒一摺此次俄使行抵塔爾巴哈臺會議情形昨已據明誼詳細陳奏所許興修房屋令華商貼補並以茶抵補各款均尙妥協已諭明誼

卽行照辦並令速立合同條約以免另生枝節茲據扎拉芬奏奏
所存夷貨須俟該城傳集夷商勘估再定抵茶價值等語亦著照
辦卽可將此案迅速議結至伊犁與該夷通商之處亦應妥爲彈
壓勿令別滋事端其餘未盡事宜並著該將軍與明誼妥協籌議
以靖邊防將此諭令知之○和春奏八月二十一日逆匪衝破江
北大營分股圍攻江南一面盡銳東趨逆眾萬餘竄至六合西南
距城止十里許畱防兵勇不及三千此外皆係民團德興阿甫由
小路抵六招集馬隊數百名紮營東面兵單賊眾危急萬分當飭
遊擊孔朝彪管帶精銳二千剋日渡江會同防剿仍由總兵馮子
材統帶其前次北援兵勇五千挫衄之餘不足以資卻敵仍令撤
回江南又江浦一邑孤懸賊中聲息不通存城及城外兵勇僅有
二千七八百人賊已三面合圍孤立無援必應設法往救因飭總

兵李若珠帶隊由江口往援該文武員弁兵勇卽於二十三日冒險出圍並拔出難民男婦一千三百餘人當飭此起官兵於渡江後由石埠橋前往六合併歸堵剿至金陵賊勢連日悉率醜類分股出巢數路衝撲張國樑親督各將備等隨堵隨擊均卽敗退而二十三日一仗追北直抵雨花臺逆營斬馘尤多兵勇亦閒有傷亡臣查該逆知我分兵他往是以疊次圍撲濠牆以圖大逞幸此閒南北濠牆一律寬深堅厚官兵分屯扼守以逸待勞可無他慮惟沿江寶塔根上下賊已安設大礮轟擊觀音門水營疊據總兵陳國泰等會函告急並稱市肆既空糧食無從購買師船難以久泊臣仍嚴飭該鎮等盡力堵禦以杜其水路下竄德興阿潰退後該大臣收合餘燼共有若干暨見在如何布置堵禦之處臣等無從知悉六合縣賊匪鳧水過河三面攻撲其勢甚張萬一稍有疏

虞大局更無從收拾臣駐軍南岸兼顧爲難而甯國之賊又復磨聚鄧紹良函請官兵往救此江浙兩省一大屏蔽關繫尤鉅無如兵力屢分之後此時更難旁及想浙江撫臣胡興仁必能將甯國赴援浙江之師趕緊調回竭力圖維也報聞○以捐輸軍餉永廣湖南瀏陽縣學額六名湘陰清泉新甯各五名醴陵四名益陽攸祁陽各三名甯鄉巴陵平江衡陽衡山沅陵辰谿武陵龍陽各三名湘鄉安化茶陵耒陽邵陽武岡新化溆浦桃源芷江麻陽保靖龍山會同石門慈利永定各一名○以克復安徽太湖縣城副都統多隆阿總兵官鮑超下部議敘餘升擢加銜有差○甲戌諭軍機大臣等前據德興阿奏浦口失利收拾潰軍力扼六合東路甚爲喫重本日據楊能格奏親赴邵伯截留潰軍搬運糧臺雖賊蹤未遠竄至揚城而人心不免震動恐其紛紛遷徙必致土匪乘機

竊發自啟亂萌何桂清見赴蘇州會辦夷務著卽派明幹大員馳赴揚州會同藩司楊能格督飭該府縣在城彈壓使居民安堵以靖內患此時德興阿旣未能分兵保護揚郡和春又遠在江南何桂清於常鎮一帶如有可撥之兵卽著酌撥赴揚以資防守並著邵燦庚長於河漕兩標內撥兵前往協同守禦糧臺銀米已移至邵伯著楊能格加意防護並趕緊製備軍裝火藥器械等項接濟德興阿軍營毋誤要需將此由六百里諭知何桂清邵燦庚長並傳諭楊能格知之○乙亥諭軍機大臣等前因浦口失利東路危急疊經諭令德興阿等嚴扼六合力保儀揚猶冀和春派往之援兵五千名攻剿得力重振軍威不意本日德興阿奏報江南官兵竟至三次挫衄僅餘二三百名管帶渡江馬隊潰敗六合孤危覽奏曷勝憤悶據奏請簡派和春張國樑一人渡江撲剿此時金陵

逆黨時圖衝撲正恐功敗垂成該大臣等未必能分身北渡已諭令再於南岸撥精兵二千迅速赴援並諭知勝保翁同書令提督德安挑帶官兵前往六合協剿本日復據何桂清奏已調上海火輪船入江助剿並將浙江撤回之西安馬隊三百名催赴江北前派去吉林及直隸提標馬隊共四百五十名諒已趕到著德興阿鞠殿華一面催提各路援兵一面將收集各兵卽交成明統帶會同溫紹原羅玉斌等見有兵勇並富明阿招回馬隊實力堵剿務期力保六合以爲儀揚屏蔽若該縣未能固守則江北大局不可收拾清淮一路均難安枕該大臣等雖抱病受傷仍當勉力督率不可稍形鬆勁摺內所稱南兵二千接仗失利是否和春等續派馬騰霄所帶之兵其最後添派孔朝彪所帶之二千名自應得力卽江浦存兵二千七八百名旣已全師而出併入六合亦著飭令

協同攻剿以厚兵力昨經諭令保奏之武職大員該大臣等如商定有人卽迅速具奏一面先令統率各軍俟德安到營會同督剿毋誤事機將此由六百里諭令知之○諭昨據和春奏探聞江北援兵潰敗復派兵勇二千名赴援本日據德興阿奏六合賊勢萬分猖獗江南援軍與之接仗三次退敗收集殘兵已由馮子材管帶過江六合孤城危急請分派和春張國樑一人渡江援救等語見在德興阿患病鞠殿華受傷未愈而賊欲方張六合設有疏虞則揚城亦屬可慮實於大局有關和春張國樑圍剿金陵正當喫緊自未能分身前往惟浦營兵勇悉已潰散德興阿等幾無一旅之師亟應厚集援兵方足以資堵禦見已諭勝保飭令德安統兵前往援應所有江南派去援兵五千名數不爲少何以一戰卽潰此時收集殘敗僅得二三百名業已渡江南去止有續派遊擊孔

朝彪所帶兵二千名恐不敷援勦著和春等再於大營抽撥勁旅二千名剋日渡江合成四千之數派得力鎮將統帶前往以保六合冀可重振軍威再據何桂清奏稱聞賊撲六合已飭令上海商捐火輪船入江助勦當此危急之秋得此可助水師之力著該督卽飭該船迅駛入江並著和春等妥爲調遣以壯南北兩岸聲勢將此由六百里各諭令知之○諭德興阿奏官軍潰敗六合危急請速籌援救一摺逆賊攻撲六合德興阿等接仗失利江南兩次派援兵勇亦皆潰敗德興阿等見已退保儀徵設使六合再有挫失則儀揚震動大局不堪設想本日已諭令和春等再行續撥精兵赴援並諭何桂清令上海商捐火輪船入江助勦惟賊勢過於披猖而德興阿病重鞠殿華受傷未愈兼恐調度一切需人相助因思德安一軍本由江南赴皖該提督老成歷練堪資臂助著勝

保翁同書卽令德安統帶勁旅馳往六合救援並助德興阿等調度毋稍遲緩至李兆受獻滁立功一節並著勝保剴切曉諭許以重賞令其速卽歸正使賊眾自亂亦足以挫其兇鋒將此由六百里諭令知之○以籌辦湖南軍務出力賞在籍郎中左宗棠四品卿銜○以克復江西吉安府城同知曾國荃等升擢加銜有差○予江南浦口六合陣亡副都統台斐音保等祭葬世職○丙子諭軍機大臣等前因勝保軍營需用馬隊諭令袁甲三於綏遠城馬隊到營後以二百名畱於徐營其餘三百名卽飭赴勝保軍營本日據勝保奏見在駐兵池河適當逆匪北竄之衝兵力實形單薄請催前調馬隊馬匹速卽前往等語所有綏遠城馬隊三百名著袁甲三遵照前旨卽行如數撥往勝保軍營聽調並帶所撥馬匹一併催令迅速進行毋許延誤至袁甲三軍營幫辦乏員據勝保

奏傳振邦史榮椿均可勝任已降旨令傳振邦幫同袁甲三辦理
勦匪事宜矣將此由六百里諭令知之○諭勝保奏統籌南北大
局請豫籌堵勦一摺所陳賊勢軍情不爲無見此時南路情形自
以江浦等處爲最重該大臣所稱先復滁州應援東路然後併力
廬郡節節進兵固係先其所急但該大臣督師懷定之交正以嚴
扼捻逆勾連之路未必遂能親往赴援昨已諭知該大臣等令提
督德安統兵前赴六合救援並助德興阿調度卽爲應援東路之
師著勝保翁同書卽遵前旨速爲調撥至潛太一路昨據都興阿
等奏已進克太湖自可漸規舒桐惟都興阿與李續賓馬步各軍
相爲輔翼勢難抽撤一軍分路進勦前諭官文酌分楚軍數千繞
赴北路至今未據覆奏俟其覆奏到時再當察看布置捻匪之由
徐宿北竄者已經山東河南兵勇沿途截勦回竄潁亳老巢山東

被陷之曹縣城武均經克復豫境亦無匪蹤所稱請飭僧格林沁撥兵駐紮大名曹州已可無須且此時夷務尚未大定天津防兵亦難遽撤該大臣既統皖北全軍惟當與翁同書和衷協力專意進剿未可以兵單餉絀爲詞坐令久稽時日將此由六百里諭令知之○命江南徐州鎮總兵官傅振邦幫同太僕寺卿袁甲三辦理剿匪事宜○以東陵蠱王廟壘著靈爽命改爲五神祠頒御書扁額○丁丑諭軍機大臣等官文奏調兵募勇前赴徐宿助剿一摺據稱都興阿李續賓馬步各軍仍應由南路進攻潛舒步步進逼惟北路空虛見已派遊擊張萬祿爲頭起糧道唐訓方爲二起共帶兵勇四千二百名前赴袁甲三軍營助剿並調普承堯等軍回九江候調等語所籌均屬周密北路匪眾由豐沛撲擾東豫復回蒙亳賊勢鴟張尙未知竄撲何處袁甲三兵力單薄著官

文飭令唐訓方等各統所部迅速前進相機助剿勿以調募需時
稍稽進發至定遠情形亦極危急都興阿等或能卽抵舒城自可
與勝保等就近會商並著官文咨令妥爲籌辦至普承堯一軍如
可由英霍赴援更足以分賊勢並著斟酌調派將此由六百里諭
令知之○諭據勝保奏稱徐廣縉見患中風懷遠一軍統率無人
請飭袁甲三趕緊前進或派員幫辦等語已諭知瑛棨飭令新授
貴州按察使王庭蘭馳赴懷遠代徐廣縉帶兵剿匪該員見在來
京陛見途中接到行知自可趕緊折回其未到以前著勝保卽飭
龍澤厚暫行統率實力攻剿袁甲三自東豫捻匪回竄亳州後卽
奏明移營前進仍赴宿州當此懷鳳剿匪喫緊之時宿州相距不
遠自應力籌兼顧未可牽綴一處致令淮南淮北聲息不通勝保
昨奏請飭李續賓由英霍起兵規取舒桐本日據官文奏報李續

賓等軍未能分路抽撥仍應由潛山舒桐步步進逼與勝保大軍南北夾擊至江西吉安見已克復擬調回兩軍以劉騰鶴一軍扼紮九江抵回李續賓舊部兵勇以普承堯一軍派由英霍一帶進援定遠所籌均合機宜勝保將懷鳳一帶布置妥協督兵南下自可與楚軍會合不虞兵力之單也至前調楚軍赴援徐宿本日據官文奏報已派遊擊張萬祿帶兵一千二百名由襄入豫派唐訓方帶原部一千名並添募二千名作爲二起一併赴援淮北惟此項兵勇調到需時袁甲三當就見有兵勇力圖埽蕩毋誤事機將此由六百里各諭令知之○諭前因九江郡城克復李續賓等卽日移師東下諭令王慶雲等將各該省應解湖北軍餉查明迅速籌解本日復據官文奏楚省分道東征各軍暨江西普承堯等水陸各軍並月撥曾國藩援閩之師需餉甚鉅倍於往時而各省協

撥楚省之餉解數寥寥請飭協濟等語楚省需餉甚殷雖不至如
皖省之支絀然以一省兼顧江皖等省派出兵勇不少則軍食浩
繁斷難獨力支持亟應速籌協濟著王慶雲恆福曾望顏仍遵前
旨將各該省每月協撥楚北餉銀源源接濟俾東下各軍毋致乏
餉以利進行將此由五百里各諭令知之○山東巡撫崇恩奏出
省督辦土匪剿撫兼施得旨土匪滋事雖不比捻逆猖狂然稍涉
鬆勁必致釀成巨患除隨時認真剿捕外尤在各屬妥辦團練選
公正紳耆素符鄉望者以督之自能弭患於未形惟不可漫無稽
考官不過問俾守望之義舉徒爲劣紳肥囊之具以致抗糧毆差
聚而難散其魚肉鄉曲有甚於土匪更不可不防著查看情形妥
爲布置能否一齊舉行之處勘明密奏不准先播風聲致不法之
輩有所藉口○戊寅諭軍機大臣等德興阿等自退保儀徵後未

據續有奏報本日據楊能格奏儀徵已於八月二十八日失守揚
郡萬分危急見在函商鞠殿華前赴萬福橋調度等語當此賊勢
猖獗德興阿等自應以力保揚州爲要務本日已諭知胡興仁將
浙江調回之總兵周天培一軍飭令徑赴揚州藉資防剿必須揚
州得保無虞乃可徐圖克復儀徵等處德興阿等收集潰兵見有
若干是否能成一軍亟應先行扼定險要以爲立腳之地前經諭
令和春續撥官兵二千名合之孔朝彪所帶共成四千名赴援六
合本日復諭令胡興仁將甯國軍營添募之勇二千名一併派往
六合攻剿德興阿等退保儀揚不能兼顧六合而該縣城堅地險
團勇足恃斷不可聽其失陷此時各路援兵能解六合之圍則挽
回尙有可望前調德安赴江北原爲協助德興阿等調度起見今
相隔已遠已諭令德安徑赴六合援剿矣總兵毛三元前在三汊

河駐紮係屬揚州下游該員素稱善戰諒此軍尙無潰散情事德興阿自應調赴前敵以遏兇鋒較之收集潰兵當爲得力其糧臺軍火既經楊能格奏利分移襄下河一帶著卽添造軍械妥爲保護以資接濟將此由六百里加緊諭知德興阿鞠殿華並傳諭楊能格知之○諭勝保翁同書奏江北大局決裂派兵馳赴天長扼剿並以後路有警勝保未能親赴來安截擊各等語江北自浦口失守後德興阿等退保儀徵本日疊據邵燦庚長楊能格等奏報儀徵天長相繼失守揚州危急勝保等諒已續經探悉該大臣等急須攻復廬州仍應兼顧懷鳳於東路攻剿自覺鞭長莫及見旣派馬隊馳赴天長亦足以分賊勢惟此時六合一縣被圍日久溫紹原素得民心尙能嬰城固守但使此城得保無虞則規復儀徵等處尙易措手所有勝保等派出之莫爾賡阿馬隊著卽飭令迅

速統帶啟程前往六合援剿前因德興阿病重鞠殿華受傷諭令傳知德安帶兵前赴浦口幫同德興阿等調度一切此時德興阿等遠駐儀徵未能與之會合德安著卽帶兵迅速前赴六合會同莫爾賚阿所帶馬隊力解城圍總須於有賊之處認真擊剿毋許觀望不前致滋貽誤勝保另片奏袁甲三奏報豐縣收復日期與該大臣所聞不符豐縣賊匪據袁甲三奏稱因聞官兵大至棄城逃遁於初十日將縣城收復旣據勝保奏收復日期不符已諭令袁甲三明白覆奏矣值此時事多艱該大臣等共辦一事惟應和衷共濟以期稍紓朕憂不得以小嫌細故動輒爭執致誤緊要機宜將此由六百里諭令知之○諭前因浦口大營失陷南岸援兵先後潰敗當經諭令和春添派官兵二千名連前派孔朝彪所帶官兵合成四千名前往救援本日據該大臣奏江北危迫情形未

見續派援兵自係尙未接奉前旨見在天長儀徵相繼失守江北各屬已有剿不勝剿之勢德興阿勒殿華見擬扼紮萬福橋止能力顧揚州勢不能再援六合堅城中峙經溫紹原等激勵練勇保守數年一旦有失則民心愈怯賊匪益無忌憚本日復據胡興仁奏稱甯國軍營見募勇二千名咨明鄭魁士選派將弁帶赴六合並由浙江籌撥餉銀一萬兩解往等語鄭魁士能否親往此項新募之勇能否得力均未可定必須有官兵爲之領率始能有濟著和春仍遵前旨速撥官兵二千名協同此項勇丁徑赴六合務使危城得保然後可徐圖進剿此時惟有上保六合下顧揚州爲最要關鍵浙江調回之周天培一軍已諭知胡興仁飭令徑赴揚州隨同德興阿等進剿以爲圖復儀徵之計該大臣卽飭知鄭魁士無論是否親往總以速援六合爲要至江北失事以後金陵賊援

益眾雖屢經擊退仍當實力堵剿不可稍存大意將此由六百里加緊諭令知之○諭本日據邵燦庚長奏清淮防剿喫重軍餉支絀請飭東省迅速撥兵助餉各一摺臨淮之賊既思下竄浦營失陷後六合被圍天長儀徵相繼失守該處距蔣壩高竇甚近防不勝防邵燦派副將鶴齡等帶兵擇要設防扼守淮安舊城並庚長所籌團練勸捐等事布置均尙周妥清淮爲北路咽喉關繫至重亟須以重兵堵剿方免震動全局山東自捻匪竄回老巢後餘匪業已肅清且距清江較近著崇恩迅速撥精兵一二千名派得力將弁管帶馳赴清江交邵燦等酌量調遣以固北路藩籬毋稍延緩至清江軍餉萬分支絀添兵必須籌餉並著崇恩迅速撥銀五六萬兩委員解赴清江以濟要需將此由六百里各諭令知之○諭胡興仁奏飛調援浙兵勇赴六合助剿一摺援浙之周天培一軍

據稱業由該撫咨催由福建馳赴六合助剿惟由建陽折回道路較遠恐其緩不濟急見在天長儀徵亦相繼失陷揚州萬分危急該處爲北路屏蔽並無重兵扼守著胡興仁卽飛咨周天培帶領兵勇徑赴揚州助剿先將郡城保護然後再圖攻復儀徵至所稱鄧紹良鄭魁士招募生力勇二千名前赴六合因恐新募之勇未經戰陣本日已諭知和春令其添派官兵同往鄭魁士能否親往並諭和春酌辦如能將甯營舊勇調赴而以新勇畱於甯營尤能得力卽著咨商鄧紹良等妥速辦理其由浙省籌銀一萬兩之處並著該撫迅速解往交鄭魁士給發以資接濟周天培兵勇口糧到揚後恐有不繼並著該撫寬爲籌備攜帶前往毋令缺乏將此由六百里諭令知之○己卯諭軍機大臣等前因桂良等奏會商夷務大概辦法並何桂清奏免稅開禁均於夷酋無涉等語已於

各摺片內嚴切批示並諭知何桂清當力持定見卽或稍爲變通亦須將窒礙之處詳細陳明不可自出己見桂良等接奉批諭自當恪遵初定辦法乃本日據惠親王等呈遞桂良等所致信函竟云免稅無裨大局弛禁之說亦屬無裨其駐京一節已有端倪入江一節頗難挽回惟有不准將內地貨物卽在內地販運無利可圖其念可息等語朕披覽之下深爲詫異何桂清以關稅接濟軍餉爲慮雖屬可原然業經接奉寄諭殊批諄諄告誡已不應再有異議況桂良等奉命而出宜如何恪遵諭旨力籌辦法乃尙未會晤意已游移是何意見且免稅卽有窒礙亦應條分縷晰詳細陳明請旨何得遽改辦法況既准其入江安能禁其將內地貨物在內地販運桂良等前在天津濫允該夷要求至有今日補救之事若再苟且了事不爲一勞永逸之計日後夷患疊起卽將桂良等

從重治罪於國事何補至免稅一節據云夷商所樂而夷酋並不知感既有益於夷商豈有夷酋不樂之理此次在天津請戶部堂官前往上海議定稅則豈非夷酋之意況此時欲收華商之稅原以補償所免夷稅若如桂良等所擬辦法又必規此小利而冒不韙之名後患仍屬無窮彼時悔之無及著桂良等再行悉心妥籌如欲另議辦法能否一勞永逸苟非確有把握朕亦斷難俯允仍當恪遵原議並細繹疊次批示止可稍爲變通不可更改大局並不准如前在天津擅自應許僅以從重治罪四字爲塞責地步懷之○添設黑龍江馬甲一千名○撥山海關稅銀一萬五千兩充直隸防兵經費○庚辰諭軍機大臣等德興阿奏收集潰兵移紮五臺山一摺天長儀徵相繼失陷此時維持北路大局自以力保揚城爲要見在收集潰散兵勇三千餘名暫令休息俟揚城一帶

布置定妥仍當激勵兵勇恢復儀徵等縣爲進取之計不得株守揚州致逆賊知我虛怯更肆鴟張六合孤城被困雖溫紹原素得民心暫堪固守若日久無援亦恐力竭失陷本日據德興阿奏和春調回此項援師有六千餘名之多著卽飛咨和春知照周天培等帶兵各員分半救援六合分半馳赴揚州協同德興阿攻剿兩處兼顧不至疏虞將此由六百里諭令知之○諭翁同書奏募兵不能得力請飭直隸省挑選精兵一千名赴皖聽調等語見在皖省南北兩路賊捻俱熾自應汰除疲兵添益勁旅以資攻剿惟山東曹單等處甫經解圍而土匪蠭起尙煩兵力埽蕩昨因清淮告警命調山東兵一二千名前赴江蘇尙未知能否如數撥往直隸與山東交界地方亦須防範所有正定大名鎮標各兵斷不能遠赴皖省轉致北地空虛前據官文奏李續賓等軍仍由潛山舒桐

步步進逼當可與勝保大軍會合又江西吉安業已克復普承堯一軍亦由英霍一帶進援定遠皖省得此兩路官兵當可分投剿辦此外各路見俱無兵可撥至所請飭催山東省地丁銀兩及山陝月撥餉銀已諭知各該撫趕緊籌解矣將此由六百里諭令知之○諭據翁同書奏寇氛日熾餉需不繼請飭催軍餉等語見在安徽南路賊勢猖獗北路捻匪充斥分兵防堵籌餉維艱自係實在情形著崇恩速將部撥地丁銀五萬兩如數趕解並著恆福曾望顏仍按月籌撥銀二萬兩解至翁同書軍營以濟要需毋稍遲誤將此由五百里各諭令知之○諭曾國藩奏請飭四川協解餉銀等語曾國藩援閩之師駐紮江西弋陽攻克安仁兵勇雲集除湖南湖北江西每月各協濟餉銀外尙不敷銀二萬餘兩見擬由瀘溪入雲際關進剿延邵該省餉項支絀無款可籌著王慶雲按

月協解餉銀二萬兩由蜀江運至湖北轉解該侍郎軍營江西全省肅清數月後如可就近籌濟即可毋庸續解將此由六百里各諭令知之○諭前調赴通州駐紮之察哈爾官兵經僧格林沁挑畱一千名其餘一千名同屯駐南苑之察哈爾兵一千撤回歸伍著慶昫仍將此項撤回兵二千名備齊軍械馬匹駐紮張家口外聽候調遣將此諭令知之○閩浙總督慶端奏收復建陽縣城報聞○予江西陣亡知縣劉本傑等祭葬世職○辛巳官文都興阿李續賓奏逆匪分股屯聚潛山縣城及懷甯縣所屬之石牌鎮地方八月十八日臣李續賓飭副將趙克彰等進駐小池驛又派總兵李續燾等移紮黃泥港二十一日趙克彰等進至潛山縣城北門外之彰法山駐營賊出大隊六七千人攢擁來撲各營趙克彰等突出擊之殪其先鋒悍賊數十人該逆稍卻仍列陣山岡副將

何紹彩等由右路鈔出保慶等馬隊由山谷繞出賊後四圍掩襲賊大驚潰署潛山縣胡履坦亦率團練相助各營乘勢攻壘把總熊士正等首先登壘各勇奮猛齊撲計破賊壘七座壘中之賊殲斃無遺隨即進偪城根緣登數次均爲礮石所阻該逆於是夜四更時由東門遁去馬步跟蹤追擊三十里約斃賊四五千名奪獲大礮七十三尊贏馬五十餘匹刀矛旗幟無算當將潛山縣城克復臣都興阿派翼長多隆阿進駐蠟樹柯又派副將鮑超進駐李家店自率各營進駐茶鋪嶺以圖石牌二十三等日我軍營盤未定賊屢次來撲均經擊退二十五日鮑超等進攻下石牌雷公埠等處賊壘多隆阿率隊進攻上石牌西北岸賊壘臣都興阿率親兵馬隊出中路策應該逆見大兵紛至力圖抵禦鮑超力攻雷公埠賊壘拔椿越濠拋擲火罐壘中火起各勇奮躍入圍壘賊盡

斃時多隆阿攻破上石牌西北賊壘亦殲賊殆盡餘壘之賊皆驚竄覓渡各勇分途截殺並梟水奪獲礮船截斷浮橋賊溺斃者不少其鎮中屋內之賊先逃過東岸者亦經馬隊繞渡鈔擊步隊各營遂乘勢過河分攻東岸各壘賊紛紛奔竄馬隊追四十餘里屍骸徧地計平毀賊壘十六座殺溺之賊約六千餘人所殺騎馬賊目甚多生擒四百餘名奪獲大礮六十餘尊贏馬七十餘匹石牌上下兩鎮賊壘一律踏平所有陣亡外委周興文等擬請照把總例議卹把總熊士正擬請照千總例議卹臣等查潛山東至安慶一百里東北至桐城一百二十里皖北之賊頻年四處分竄皆以安慶爲老巢而恃桐城爲犄角二處各屯逆眾數萬幾成不拔之禍基而桐城毗連舒城尤楚軍北行必由之路臣等擬以一軍聯絡水師進攻安慶以一軍力擣桐城俟安慶桐城克復後卽督師

北上相機堵剿 上諭內閣逆匪屯聚潛山縣城及懷甯縣屬之
石碑鎮地方都興阿李續賓分路進剿克復縣城並將石碑上下
賊壘全行踏平著都興阿等卽聯絡水師進攻安慶並力擣桐城
迅殄賊氛○諭軍機大臣等勝保等奏南北軍情並緊分籌堵剿
一摺覓在皖省南路逆賊方張北路捻氛復熾加以東面天長旣
失盱眙爲我軍通餉之路不容再有疏虞該大臣業派保英等帶
兵會合莫爾賡阿馬隊赴天長迎頭截剿並經翁同書添派兵勇
飭副將惠成帶赴明光鎮扼紮此時總宜力護餉道勿令阻梗並
嚴堵懷遠免令蔓延勝保等兵力雖難兼顧惟須探明有賊之區
向前迎擊龍澤厚一軍在渦河挫敗本應將該總兵及帶兵各員
弁治以應得之罪姑念潰軍由於缺餉免予懲辦著勝保等飭其
勉圖後效以贖前愆儻再不知愧奮卽著從嚴參辦將此由六百

里諭令知之○賞工部左侍郎杜翰戶部右侍郎杜翻銀四百兩
辦理伊母喪事○以潘曾瑩爲工部左侍郎○壬午諭軍機大臣
等明誼奏俄夷互換文憑照舊通商一摺塔爾巴哈台焚燒夷圈
一案經明誼等疊次開導用茶箱貼補分年賠償見已互換文憑
通商和好辦理尙爲妥協所有一切籌備貼補各事宜並所定條
約卽著照議辦理令卽速帶兵離卡以安民心至伊犁委員哈布
齊賢等隨同辦理此案已閱數年尙屬著有微勞著明誼咨會扎
拉芬泰酌量保奏候朕施恩將此諭令知之○諭本日據德興阿
奏賊陷揚州退扼萬福橋又據楊能格奏兵勇潰散江北益加危
急各摺片覽奏竇堪憤懣德興阿收集潰兵移紮五臺山方冀其
重振軍威力圖儀徵等處爲進取之計乃天長之賊直奔揚州初
三日攻破郡城據楊能格奏報情形縱火之賊數止七八十人而

各路兵勇望風潰散是德興阿自浦營失陷之後已不能成軍見在退守邵伯揚州南路已屬空虛深恐賊匪渡江而高郵又有賊蹤設再有疏虞北路亦不堪設想德興阿見尙患病鞠殿華受傷未愈本日已降旨令總兵毛三元幫辦軍務該總兵卽協同德興阿加意整頓申明軍律扼要設防以遏賊匪北竄爲要見已諭勝保撥兵徑赴揚州以助德興阿等兵力復命和春帶兵駐紮鎮江派兵北渡爲攻取揚州地步所有調回援浙之周天培所帶官兵仍諭和春分半救援六合分半攻取揚州俟該官兵到後卽由和春調度或親自督帶過江攻剿揚州屆時德興阿等務當會合夾擊以圖恢復楊能格見在裏下河所有該處糧臺著妥爲保護勿許疏失將此由六百里加緊諭知德興阿鞠殿華毛三元並傳諭楊能格知之○諭本日據德興阿奏揚州失陷退紮邵伯埭另股

賊匪又向高郵竄撲各情不圖江北各軍挫敗至此覽奏曷勝憤懣已降旨令毛三元幫辦德興阿軍務仍責令該大臣等力扼北竄俟援軍到齊卽圖進取惟軍心渙散賊氛愈張德興阿等退守邵伯已在揚州北路而南路無兵扼守恐該逆復擾瓜州卽鎮江亦屬可危金山峙立江心尤爲扼要之地雖據德興阿前奏瓜州有副將鞠耀乾督帶師船駐守並有和春所調黃彬師船駐泊鎮江恐尙不足以資遏截萬一瓜鎮有失則前功盡棄實屬不堪設想著和春暫將金陵攻剿事宜交張國樞妥爲調度該大臣卽酌帶官兵前赴鎮江駐紮就近調遣水營戰艦嚴扼金山並另派勁兵渡江駐紮瓜州勿令揚城逆賊南竄俟由浙調回之周天培各軍到後卽照前諭分撥一半救援六合其餘一半和春卽可督帶渡江攻復揚州此外另諭勝保撥兵赴揚以助德興阿等保守北

路屆時即可爲南北合攻之計何桂清前赴蘇州會辦夷務見在賊勢猖獗急應折回常州藉資彈壓俟和春渡江卽著該督移紮鎮江以資控馭至揚州失陷在城文武如何下落著查明具奏將此由六百里各諭令知之○諭前因清淮防剿喫重諭令崇恩撥兵一千名派赴清江交邵燦等調遣本日據德興阿奏揚州府城已被天長逆匪攻陷另股又撲向高郵儻該州有失則邵伯前後皆賊清淮道路隔斷賊可直竄清江闌入東省等語見在德興阿駐紮邵伯所集潰兵節節退避邵伯以西之陳家溝等處地方亦有賊蹤清江相距不遠情形愈增喫緊必須重兵堵剿以杜北竄所有山東派赴清江之兵如尙未啟程著崇恩迅派得力將弁管帶飛速前往以便邵燦等趕緊布置援應高郵一帶如兵力尙屬不敷卽著邵燦庚長與袁甲三伊興額等函商如徐州兵可以分

撥卽當先其所急派赴清江協同防剿儻徐州亦形喫緊自可毋庸勉強邵燦等惟當撥兵擇要設防爲高郵邵伯後路策應並嚴扼清淮以固北路藩籬將此由六百里加緊各諭令知之○諭勝保等前以儀徵天長相繼失陷分派莫爾賚阿馬隊馳往攻剿當以六合孤危諭令赴援昨又據勝保等奏續派保英等帶兵前赴天長截剿翁同書亦添派兵勇飭副將惠成帶赴明光鎮扼紮原以力護盱眙餉道並救援東路起見本日據德興阿奏揚州已於初三日失守德興阿退紮邵伯而高郵迤西及邵伯之陳家溝等處均有賊蹤北路情形更形喫緊該處收集潰兵見賊卽逃斷不足恃著勝保等卽飭前派各兵繞至揚州萬福橋一帶以助德興阿兵力至南路空虛見命和春帶兵馳往鎮江扼要調度俟援浙各兵調回卽可與勝保派往之兵南北合剿見在勝保等旣無暇

攻勦廬州惟有酌分兵力以助揚州亦於大局有益至六合孤城

存亡未卜仍著德安馳往援救和春所撥兵勇到後兵力亦不爲

單薄並著勝保就近調度將此由六百里加緊諭令知之○命柏

葭爲大學士調瑞麟爲戶部尚書肅順爲禮部尚書以瑞常爲理

藩院尚書綿森爲左都御史

由馬蘭鎮總兵官選

○以湖廣總督官文協辦

大學士○命翁心存爲大學士調朱鳳標爲戶部尚書以陳孚恩

爲兵部尚書

著禮部尚書

○命直隸大名鎮總兵官毛三元對辦欽差

大臣德興阿軍務○以揚州府城被賊竄陷革欽差大臣德興阿

騎都尉世職拔總兵官鞠殿華花翎○癸未諭軍機大臣等八月

間擒匪由豐縣竄東省曹單等處均因民團協力得以卽時擊退

該匪由東竄豫復以團練整齊退回蒙亳是辦理團練以助兵力

之不足實屬著有成效此時皖北賊氛延蔓儀徵天長揚州各郡

縣相繼失守高寶均已震動北路籌防極關緊要亦未能遽議徵調致滋擾累惟有聯絡民心使之固結不解則內匪無由竊發卽外匪無可窺伺直隸省南路各屬與山東河南兩省在在毗連尤應未雨綢繆以期有備無患著慶祺督飭所屬文武商同各該地方公正紳士將應行團練各事宜實力籌辦毋得有名無實儻地方官有陽奉陰違不肯認真勸辦或藉端騷擾以致民人解體者卽著從嚴參奏其能盡心勸諭及紳民人等實能捐貲出力者准其隨時保奏並著安速舉行不得稍涉延緩將此諭令知之○諭昨因德興阿奏揚州失守清淮喫重諭令邵燦庚長函商袁甲三等酌撥徐州兵勇協同防剿本日據趙德轍奏請添調精兵防賊南竄鎮江北竄淮揚等語自係未知揚州失事之信見在鎮江一路已諭令和春親往調度並派兵渡江攻取揚州諒該大臣等接

奉諭旨自能安籌布置以遏南竄惟清淮一帶實屬空虛各路帶兵大員均有鞭長莫及之勢清江淮安北路要衝卽該漕督等之責所有漕河兩標官兵及清江所募練勇急應挑選精銳擇要布置近防不如遠勦總期力扼高郵邵伯庶清淮可保無虞至揚州兵力尙嫌單薄昨諭勝保仍飭德安往援六合而令派往天長之保英等所帶兵勇繞赴萬福橋助德興阿等防勦其浙江調回之周天培等軍約六千餘人亦令分半赴援六合以一半助攻揚州但恐緩不濟急著袁甲三傳諭傅振邦與鞠殿華毛三元等協力進攻迅圖規復前諭調山東兵一二千名馳赴清江本日已諭崇恩迅速派往卽歸傅振邦統帶至徐州勦匪應須武職大員卽著袁甲三於得力將領中酌派一員督率進勦毋任遲延將此由六百里各諭令知之○甲申以恭送 孝賢純皇后 孝儀純皇后

仁宗睿皇帝 孝淑睿皇后 孝和睿皇后 宣宗成皇帝

孝穆成皇后 孝愼成皇后 孝全成皇后 冊 寶 仁宗睿

皇帝御容 宣宗成皇帝實錄 聖訓供奉尊藏盛京詣 太廟

行禮○欽差大學士桂良等奏會同何桂清商辦夷務情形得旨

即使照該督之意辦結問該督能以首領保之是該督真有把握

朕亦無不欣允○乙酉幸圓明園○諭軍機大臣等崇恩奏克曹

二鎮官兵未能聽袁甲三調遣等語所稱山東省兵力本單設再

聽袁甲三調遣則事權不一本省防剿愈難措手自屬實在情形

所有克曹二鎮官兵設遇有袁甲三咨調之處仍著崇恩斟酌辦

理不得遽行出境轉致該省腹地空虛將此由五百里諭令知之

○予山東陣亡教諭趙介福等祭葬世職○丙戌諭軍機大臣等

前因揚州失陷諭令勝保派兵前往德興阿軍營助剿本日據和

春奏江北軍情緊急張國樑親統大兵六千餘名渡江剿辦德興阿等收集潰兵已不能自振得此重兵相助尙可克復揚城並據勝保等奏東西兩路擊賊獲勝但兵力不敷軍情仍屬危急天長逆匪直撲盱眙經營總莫爾賡阿等截擊敗回設盱眙再有疏失則清淮亦屬可虞該大臣派莫爾賡阿駐紮天長盱眙之間卽飭該營總速行進剿籌復天長至前命勝保撥兵繞往揚州如道路難通兵少未能深入今揚州既有張國樑重兵前往勝保等又須兼顧定遠未可偏重東路卽以莫爾賡阿一軍進剿東路毋庸再行分兵赴揚前調湖南四川官兵見據王慶雲奏已遵撥一千名派副將成興統帶於九月初二日啟程湖南省尙未奏到至六合孤城被圍日久浙中調回周天培等所帶兵勇深恐緩不濟急前諭勝保等派令德安統兵往援卽著飭令迅速前進實力援應不

得稍涉遲誤袁甲三見駐宿南務與勝保等和衷共濟南北夾擊以免捻匪再圖北犯前諭飭令傅振邦前赴清淮並令崇恩撥兵一二千名交該總兵統帶助剿此時天長賊匪圖撲竄寶應是邵伯後路已不免有賊蹤清淮萬分危急著袁甲三卽飭傅振邦迅速前進迎頭截擊勿使賊氛蔓延所撥山東官兵並著飛催應調毋任遲誤並著迎調未到馬隊馬匹毋任逗留將此由六百里各諭令知之○諭和春奏續派重兵赴援江北一摺覽奏深合機宜見在揚州已失德興阿退駐邵伯收集潰兵不足四千勢難復振得張國樑親督重兵前往援剿揚州可望克復此時張國樑進兵由江南北渡該逆自不能徑撲南岸而浦口儀徵通江之路正復不少總以金山爲扼要該大臣前調黃彬李新明師船分泊鎮江及石埠橋其金山要隘尤須有水師扼守以爲大江鎖鑰南岸鎮

江亦宜妥爲布置至六合被圍已久若待張國樑克復揚州儀徵再往援救恐其力已不支浙江調回之兵又緩不濟急鄭魁士旣不能遠離灣沚其所募之勇或另派得力將領統帶赴援六合亦可稍資策應前命勝保派德安帶兵救援六合但恐安徽所撥兵力較單此時江南大營屢次分兵賊勢方張該大臣等務當通籌兼顧毋稍疏虞將此由六百里加緊諭令知之○丁亥諭軍機大臣等本日據桂良等奏吏務辦理棘手等語桂良等未抵上海卽將內定辦法擅擬更改已屬大負委任業經嚴切批示並疊次寄諭乃甫經到滬一切尙未會議卽已別生枝節若必盡遂該吏之欲則是中國黜陟之權外夷得而操之尙復何所底止惟桂良等旣有另片參奏黃宗漢之語業經告知夷人是以另發寄諭將黃宗漢等所辦原委及羅惇衍等見已停兵之處示明使知桂良等

並非誑語以安其心而示之信至會議辦法總須恪遵九月十二日諭旨將派員駐京內江通商及內地遊行賠償兵費始還廣東省城四項全行消弭方可曲從所請若如所奏止將第一要事消弭並於稅務中將賠款按年攤還令其還廣東省城其餘各事從緩想法是仍然貽患無窮斷不能允桂良等既已擅允於前又不能挽回於後轉於前議之外別起波瀾何桂清身受重恩於特命會辦之件輒執一己之見苟且了事甚至有不忍言不敢言等語試思利害所在有何不可詳陳而爲此隱約之詞耶再不能悉心妥籌將四項要件挽回朕亦別無他諭桂良等自問當得何罪○諭袁甲三奏軍情緊急請飭催各省月撥餉銀等語前因袁甲三糧臺缺餉諭令山東等省自本年六月爲始每月各撥銀二萬兩茲據奏河南省按月認解銀二萬兩山東省僅解過一萬兩見在

各營口糧欠發已久兵勇飢寒交迫難免鼓譟之虞情形實爲緊急山西省已解過銀二萬兩其山東河南兩省迄未能按期報解未免貽誤事機著崇恩瑛榮仍遵前旨責成各該藩司每月各撥銀二萬兩解交徐州糧臺以應急需毋令缺乏將此由五百里各諭令知之○諭據袁甲三奏傳振邦奉調行抵濉溪遇賊失利見飭整頓隊伍占定濉溪再圖進剿等語揚州失守以後天長賊匪東窺寶應清淮一帶情形實屬危急昨據和春奏張國樑業已統兵渡江並恐南路得手逆眾益圖北竄著袁甲三遵照前旨卽飭傳振邦統領所部剋日馳赴清淮相機迎剿毋令賊匪得以北犯所調山東官兵並著催提迅速前進至濉溪地方亦關緊要卽著袁甲三另派得力之員帶兵防堵一俟淮揚軍務得有轉機卽可令傳振邦仍回徐州助剿將此由六百里諭令知之○命甘肅西

甯鎮總兵官成明幫辦欽差大臣德興阿軍務○戊子諭軍機大臣等王懿德奏帶兵前赴延平督辦防剿一摺王懿德前因患病給假調理茲以病體稍痊卽於八月二十日由省啟程前赴延平督辦軍務具見急公惻忱覽奏欣慰本日據慶端奏崇安克復以後邵武賊勢極爲窮蹙卽著該督激勵弁兵速籌攻克俾全省均就肅清至省城亦關緊要王懿德行抵延平接印後慶端卽著回省周天培一軍因江北儀揚失陷六合被圍疊經和春等奏請調回援應業經諭令速行調往並著王懿德飭令該總兵統率所部迅速啟程馳往江蘇聽候和春張國樑調撥毋許遲誤將此由六百里諭令知之○諭前因懷鳳軍情喫緊徐廣縉猝患中風因念貴州臬司王庭蘭在籍辦團尙爲得力曾經勝保等保奏是以令其暫緩陞見折赴懷遠統率徐廣縉所帶各軍茲據瑛榮奏稱王

庭蘭身體多病辦理軍務恐非所長難資捍禦各等語惟該員接奉瑛榮行知計已折回懷遠軍營仍著勝保就近飭令該員暫時統帶並加察看如果不能勝任卽著另擇膽略素優堪勝此任者酌保一人迅速具奏王庭蘭俟接替有人卽著來京陛見將此由五百里諭令知之○予福建殉難知縣莫自逸祭葬世職建祠○庚寅諭軍機大臣等勝保奏德興阿自浦口失事以後節節退避請飭實力前紮抑或另派重臣等語此次德興阿堵剿不力以致兵勇潰散儀揚等處相繼失守一敗塗地實所不料因念德興阿患病鞠殿華受傷故僅予薄懲責令收集潰兵迅圖克復復派總兵毛三元成明幫辦軍務昨據德興阿等奏稱張國樑親督重兵渡江赴援已抵萬福橋見已豫派兵勇隨同南岸官軍進剿邵伯等處亦連次擊賊獲勝該匪尙未北竄勝保因儀揚失守馳抵盱

貽力籌扼勦實屬不分畛域深合機宜此時東路有張國樑等勦辦一經得手該逆勢必回竄自應扼要堵勦未便深入致西北空虛盱眙密邇天長該大臣業經派兵攻擊若能迅拔天長則亦可孤六合儀揚之賊勢惟鳳臨捻匪尙未勦除廬州亦未收復賊蹤分竄在在堪虞如翁同書一軍堪資禦侮則勝保自應仍駐盱眙以壯聲威而籌攻勦設或定遠等處情形緊急該大臣仍當折回策應未可偏重東路致有疏虞將此由六百里諭令知之○諭前因江北糧臺用款支絀當諭河南山東陝西各省將應解江北協餉按月籌濟山西亦酌量撥解以濟急需茲據楊能格奏餉源日絀各省欠解尙多請飭催撥解等語見在浦口揚州先後失陷行營軍火一空用款日繁而餉源日絀支應益難自係實在情形著崇恩恆福瑛榮曾望顏各將欠解江北糧臺協餉趕緊籌解以資

接濟毋誤要需將此由五百里各諭令知之○壬辰諭內閣前據李鈞等奏運河挑工請全用寶銀以資趕辦當交戶部議奏茲據奏稱東省運河工需例價已有五成寶銀其津貼之款如動七年以前商息照例銀鈔搭放各該廳果能覈實支發毫無侵蝕必可有贏無絀何得仍以不敷爲詞率請全用寶銀李鈞等所奏著毋庸議至見在運道梗阻來年是否分成河運尙在未定並著該河督將辦理河運擬挑淤墊之處暫停挑辦以節糜費○官文都興阿李續賓奏桐城城高而堅係皖省東北路之樞最爲要害自咸豐三年十月間該逆盤踞城中淪陷至今其城之北門跨山該逆於山上修大瓢壘二座東北一帶修大瓢壘三座小壘四座又於西南一帶修壘四座恃爲負隅久計臣李續賓派副將趙克彰等拔營先進親率副將何紹彩等繼之趙克彰等至城外五里墩地

方正在紫營該逆分五路來趙克彰等列陣於中路山上以當其衝黃勝日等排列於右丁銳義等隱伏於左該逆逼近趙克彰等齊出橫衝刺斃悍賊多名賊皆狂奔保慶等各率馬步急追遂乘勢攻破西南四壘計斃賊一千六七百名次日賊復由西門出撲趙克彰等整隊鏖戰其東北面城中壘中之賊潛出大股自山後繞鈔我營後路適臣李續賓率後隊各營甫至突前迎擊出賊不意各營奮力前衝賊滿山奔竄殺斃約二千餘名其前面撲營之賊亦驚潰繞奔東北門入城固守臣李續賓卽率營追至近城當飭各營偪城之西南北三面駐營連日加修營壘派副將何紹彩等攻西南城門親率李續燾等馬步由西門繞南門而東先攻東面兩大壘各營一鼓猛撲銳氣百倍越濠緣登其賊壘止有一門及各勇攻入無路奔竄圍而殲之遂分攻四小壘羣賊見兩壘悍

賊盡被屠戮蒼黃驚亂棄壘而逃趙克彰等各勇攔截殺之其第
三大壘切近城垣各營分兵近逼城門賊不敢出各弁勇奮力撲
壘破其壘門盡殺壘中之賊轉攻北門山上大壘仰攻逾時火彈
拋入二壘相繼火發羣賊被焚被殺無得脫者自卯至申其破賊
壘九座殺賊約六七千名諸壘既破乘夜飭趙克彰伏東門外之
高更樓木魚山一帶朱希廣等攻北門李續燾等攻南門周寬世
等攻西門列炬環城火光如晝三更時各勇乘隙緣登賊拌命開
東作向陽二門分路衝出趙克彰等伏兵齊起前後夾擊追殺四
五十里屍積道旁奪獲羸馬五百餘匹大礮百餘尊旗幟軍械火
藥鉛彈五千餘件臣李續賓進城招集士民桐城縣城業經克復
所有在事最爲出力之副將趙克彰等謹先行開列懇請分別獎
敘其餘出力之文武員弁可否由臣等覈實奏獎出自 天恩

上諭李續賓督兵進攻桐城派令副將趙克彰等各營先後繼進
攻破城外賊壘乘夜進攻各門各勇攀登前後夾擊收復縣城安
徽桐城縣地方險要被賊盤踞數年此次進攻克復迅速辦理尙
屬得手仍著官文飭令李續賓等督率各軍以次進克舒城等處
埽蕩逆氛○癸巳諭軍機大臣等胡興仁奏請於饒郡駐紮重兵
以重三省邊防等語饒州爲皖南浙江福建等省邊防重地見在
福建省邵武一城尙爲賊踞九龍山亦時有土匪滋擾皖南一帶
之東流建德爲賊蹤出沒之所若以重兵扼紮饒州則皖南可資
策應而於三省邊防均有裨益見在江西省吉安府城已復全境
業已肅清惟據曾國藩奏景德鎮尙有賊蹤正宜移撥官兵擇要
扼紮杜三省之竄越卽以固江西之藩籬著耆齡酌量選派得力
將弁統帶重兵前赴饒州駐紮以資防守將此由五百里諭令知

之○甲午諭內閣德興阿奏南北兩軍會同攻克揚州府城一摺
逆匪竄踞揚城後屢由西北山焚掠並於黃珏橋等處出沒無常
圖犯邵伯經張國樑由南岸督帶重兵渡江九月十四日夜聞密
諭各營挑選勇隊進攻東南兩門逆匪擁眾出撲我軍勇氣百倍
轟斃逆匪無數匪卽敗退遊擊馮觀勝黃靖等帶領兵勇分路殺
至各門突有騎馬悍賊由北擁出張國樑飛令兵勇飛馬迎擊並
施放擡礮連環繼進轟斃黃袍賊首五名賊隊驚亂張國樑飛令
四路馬步各官軍一齊搶進鞠殿華成明富明阿等相繼追擊逆
賊自相踐踏賊屍枕藉殺斃淹斃轟斃不計其數遂於九月十五
日將府城克復此次賊踞揚城旬餘卽行克復剿辦尙爲迅速所
有在事出力人員著准其會同張國樑擇尤保奏○諭勝保翁同
書奏截剿北竄粵匪大獲勝仗一摺逆賊竄踞天長意圖北竄分

股約二萬人於十二日直撲三河集經派防蔣壩道員赫特赫訥帶勇堵禦未能過河適勝保派援之副都統麟瑞等督兵馳至高橋遇賊接仗殺賊多名逆眾猶思竄渡並糾合各村匪徒肆行焚掠官軍於十三日復加痛剿蔣壩防兵亦極力轟擊賊匪大敗奔潰勝保復督帶親軍抵三河集該逆遂悉數南遁先後殲匪五百餘名被轟斃者不計其數三河集地方業已肅清辦理尙屬得手所有在事出力員弁兵勇著勝保俟追剿竄匪淨盡彙請獎勵其蔣壩防堵出力人員並著邵燦庚長查明保奏○諭扎拉芬奏奏查明回莊啟釁原委請將辦理不善各員分別懲辦等語上年喀什噶爾回界滋事既因銅廠交課苦累聚眾抗差經前任領隊大臣巴哈善派委驍騎校巴彥察浪章京佛爾果布疊次往勘輒聽回眾飾詞草率稟覆實屬顛預巴彥察浪佛爾果布均著照議革

職佛爾果布於派辦善後尙能得力著仍畱該城當差以觀後效
前任領隊大臣巴哈善換防總兵伊綿阿前經降旨革職畱任著
俟八年無過方准開復葉爾羌參贊大臣慶英到任未久幫辦大
臣固慶本無統轄之責前署領隊大臣阿克達春未經辦理銅廠
均著加恩免議英吉沙爾領隊大臣烏勒欣泰雖查無畏葸重情
究屬疏於防範著交部照例議處撤任阿奇木伯克愛瑪特失守
回城罪有應得念其平日尙屬急公亦無苛派陵虐情事著免其
斥革以昭平允○諭軍機大臣等本日據德興阿等奏揚州府城
業於十五日克復張國樑帶兵由儀徵前往六合並稱高寶一帶
時有賊匪由湖東犯各等語並據勝保等奏截剿天長北竄粵匪
大獲勝仗逆眾悉數南遁一摺天長竄匪直撲三河集意圖北犯
經勝保督飭弁兵擊退辦理極爲得手惟該逆被剿南遁設由湖

內竄撲高郵寶應則清淮仍形喫重必應將天長縣城速爲克復庶賊眾無由東犯即可杜其北竄見在張國樑親赴六合於儀揚等處尚可兼顧至天長地近盱眙卽著勝保乘此聲威將該處賊匪痛加攻剿速復縣城無任逆賊久踞提督德安一軍據該大臣奏稱業經啟程並著飭令迅速前赴六合會同張國樑速解城圍至懷遠軍務馬頭城等處業已肅清徐廣緝病勢較減著卽飭令該員會同龍澤厚妥籌攻剿並須嚴密布置毋得再有疏虞將此由六百里諭令知之○諭本日據德興阿奏高郵寶應沿湖均有賊船恐其東竄清淮並據勝保奏賊匪竄聚三河集經蔣壩兵勇會同官軍截剿獲勝已令德興阿酌撥揚營兵勇前赴高郵一帶協同堵剿矣見在德興阿收集兵勇尙有萬餘揚州府城業已克復張國樑已赴援六合勝保亦進攻天長自應以清淮一路爲最

要著邵燦等督飭在事員弁實力堵剿務使賊蹤不能過湖北路
方有把握如不敷調度卽飛咨德興阿將諭撥之兵迅速派撥以
厚兵力傳振邦是否已抵清江前調山東官兵據崇恩奏已派兵
四百名派勇六百名兼程前進儻該總兵帶兵到浦可令其暫畱
助剿俟逆氛漸遠再行折回徐州將此由六百里各諭令知之○
諭慶端奏請畱帶兵總兵以資鎮守等語福建漳州鎮總兵周天
受雲南鶴麗鎮總兵周天培此次帶兵援閩克復各城戰功懋著
該撫請畱該總兵等在閩坐鎮自係爲保障地方起見惟周天受
一軍因皖南緊急經張芾調回防剿昨據胡興仁奏該總兵見在
籌攻婺源周天培一軍因江北軍務喫緊業經飛調該總兵回至
江蘇見在揚州雖已克復而浦口天長儀徵尙淪於賊需兵甚急
未便遲畱見在閩省邵郡克復全境已漸肅清並有饒廷選張騰

蛟林向榮等員堪資差遣已不乏人卽著王懿德等妥爲調度俟
徽郡軍務稍鬆再令周天受回漳州本任可也將此由六百里諭
令知之○諭扎拉芬奏請飭前任阿奇木伯克赴阿克蘇聽候
諭旨等語前任喀什噶爾阿奇木伯克愛瑪特失守回城本日據
扎拉芬奏請將該員革去伯克仍畱世職原屬咎有應得因念
愛瑪特平日尙知急公業經降旨從寬免其革去伯克惟據扎拉
芬奏稱訪聞逆黨因恨愛瑪特疊次首告計圖報復該員旣無
經手未竣及交代未清等事自不必令其久處喀城以致別啟疊
端著裕瑞卽飭愛瑪特前赴阿克蘇伊子任所將此諭令知之○
署閩浙總督慶端奏攻克邵武府城福建地方一律肅清得旨嘉
獎下部議敘○江西巡撫耆齡奏福建股匪竄至廣豐復竄玉山
勢極猖獗經候選道李元度廣饒九南道沈葆楨等力保兩縣危

城擊敗數萬狂寇實屬異常出力其竄新城縣者經張運蘭等兜
剿撲滅另股由瀘溪竄安仁張運蘭及各屬團勇水師合力攻剿

殲斃七八千名邵武大股復犯新城劉長佑大敗之殺賊三四千

名仍飭令將回竄賊匪剿洗淨盡報聞○以福濟宜振俱爲內閣

學士

福濟前安徽巡撫宜振由翰林院侍讀學士遷

成琦爲左副都御史

由詹事遷

○予陣亡

知縣韓彤文等祭葬世職

○乙未諭內閣刑部奏酌擬因瘋斃命

罪名請改歸畫一等語向來因瘋連斃人命案犯係平人非一家

二命者俱擬絞監候入於情實而致斃期功尊長尊屬一命另斃

平人一命者向援服制之例夾籤聲請雖絞斬輕重不同而一句

一免殊不平允至連斃三命內有期功尊長尊屬一命者亦俱援

服制之例夾籤更覺寬縱著照該部所請嗣後此項人犯除連殺

平人非一家三命或一家二命者仍照例入於情實致斃服制一

命復另斃平人一命者仍照例夾籤聲請外所有因瘋致斃平人非一家二命之犯著改入緩決辦理以昭畫一而示持平其致斃期功尊長尊屬一命另斃平人二命之犯無論是否一家俱著按律擬斬立決毋庸夾籤聲請以重人命其本年秋審案內張懷一犯卽著改入緩決辦理○官文都與阿楊載福李續賓奏自克復潛山桐城後臣都興阿由石牌率師東剿安慶派翼長多隆阿總兵鮑超爲前敵由清河三橋鎮進兵齊會大橋頭該處踞賊築壘山旁及橋南一帶以拒官軍進剿之路乘我兵初至遽擁出敵官軍各起馬隊逾橋涉水數路衝擊賊遂潰退兵勇分途追殺斃賊過半前去二十五里集賢關有賊踞關守險多隆阿帶隊出總鋪繞攻關內賊壘鮑超率隊由圍山徑趨集賢關參將石清吉率飛虎三營暨各馬隊兩路接應關內壘賊不料官兵繞山突至裏壘

驚逃我兵四路追殺賊壘賊卡盡行削平時鮑超率霆營已至集賢關守關賊匪正在抵禦見壘賊潰敗卽蒼黃失措我兵乘勢攻之遂破其關潰賊緣山繞谷復被我兵追殺甚夥共計殺賊千餘名我兵遂進集賢關分紮十里鋪一帶九月初七日賊乘我營未竣由北門數路來撲正值多隆阿帶馬隊前往瞥見賊來一面飛調部隊接應一面分途衝擊射斃騎賊數名餘始挫退次日臣都興阿會商福建提督臣楊載福豫派礮船南列江面東由上新河入湖西由楊柳洲入湖三面轟擊牽制城賊初九日多隆阿鮑超率勇分攻城邊賊壘先派張萬祿等馬步隊列陣西岡以防西門援賊派石清吉等馬步隊列陣東岡以防東門援賊巴依爾呼蘭馬隊中路策應其壘俱極高堅火器難施壘外濠深兩丈密布椿籤濠外復有溪池護繞多隆阿鮑超各督勁旅鳧溪越籤拔椿入

濠鑿級而上賊抵死抗拒我兵奮勇爭先各壘賊皆驚惶我勇各路齊登直突橫衝巷戰良久賊屍枕藉其竄踞屋中者經我兵揭椽掀瓦搜斬無遺北門城邊大壘四座同時平毀官兵勇氣倍增復乘勢攻破東西山灣小壘五座其城賊由東西兩門出援數次均經接應馬步隊擊退共計破壘九座殺賊五千有餘奪獲大礮七十三尊大小擡槍九百餘件生擒長髮賊五百二名臣都興阿當飭多隆阿鮑超等卽於近城處修營開濠力圖偏攻惟該逆憑踞堅城又多積聚其麇集城中者率皆強悍兇逆而不游外來援賊復偏近樅陽一帶官兵內攻堅城外勦強援臣等惟有勉勵各軍水陸會合迅圖克復此次偏城一戰卽平九壘皆由多隆阿鮑超督飭有方官兵十分奮勇可否由臣等擇尤彙請獎敘出自天恩 上諭官軍進剿安慶先將大橋頭一帶賊壘攻破徑趨集

賢關賊眾棄壘驚逃我軍四路追殺賊壘賊卡盡行削平城邊賊壘復乘勢攻破殺賊五千餘名生擒賊匪五百二名著官文等卽飭在事文武認真攻剿迅復堅城並將附近樅陽一帶援賊分投掃蕩所有出力員弁著官文等查明保奏○和春奏南岸防剿事宜臣等屢飭水陸各營晝夜嚴防竄越九月初七八等日烏江一帶有大幫賊船乘風下駛我軍迎頭兜剿轟沈逆船十餘隻奪獲九隻斃賊五六百名連日金陵賊匪因我兵四出多方肆擾均經守牆鎮將督率兵勇合力擊回其鋒稍戢其石子岡一帶濠壘計長一千數百丈見已晝夜趕築約須一月可以蒞工惟西路銅井慈湖等處逆援愈集愈多號稱數萬均由青陽池州而來揚言分道內犯高淳溧水秣陵關等處以救金陵已飭總兵虎嵩林等嚴密防維互相策應並咨鄧紹良就近兼顧至鄭魁士督辦灣防前

經胡興仁奏令募勇二千馳援江北該鎮新勇業已募足俟浙省
解到軍裝卽行拔隊前來臣函屬其取道高淳東壩察看賊情緩
急設法圖維儻該處警報稍紆仍來金陵調遣以收指臂之助又
奏查八月二十二日蕪湖股匪傾巢直撲魯港水營遊擊鄭吉星
等開礮轟擊接仗未久老鴉山白馬山兩處各出悍匪千餘盡擁
而來會合石碓股匪鈔襲馬步橋營卡都司馬喜督帶划船輪流
迎擊該逆從礮火叢中填壕直進遊擊郭定猷連開大礮轟斃悍
賊數名守備梁正源等各率所部四面包鈔賊眾大潰由蕪湖竄
逸同知林士志督帶廣勇橫鈔截擊一路賊屍枕藉直抵老鴉山
始行收隊其劉家村高埂鋪兩路之賊亦經參將李起高等擊退
共計斃賊七八百名報聞○諭軍機大臣等本日周天受謝恩摺
內有據晏端書面稱開化失守因卽督兵由江山取道闡剿等語

逆匪由閩回竄華埠喫緊曾經晏端書奏報嗣據李定太奏稱浙省見稱安謐已咨會周天受由江山進攻婺源是開化失守一事想係晏端書傳聞之誤衢州各屬多與徽郡接壤而距浙江省城較遠此後軍情著張芾就近探明隨時奏報昨據慶端奏閩省失陷各城雖已克復而盜匪充斥武備亟應講求請畱周天受周天培在閩坐鎮當諭以周天培仍應飭赴江蘇未能畱閩如徽州軍情稍鬆可令周天受前赴漳州本任此時該總兵攻剿婺源如已得手能否飭往閩中以資鎮守著張芾斟酌情形妥籌辦理將此由六百里諭知張芾並傳諭周天受知之○以張光第爲安徽布政使恩錫署安徽按察使

丁憂按察使

○予安徽陣亡縣丞王松林等

祭葬世職○丙申諭內閣朕聞各省辦理捐輸多有抑勒賄縱情弊該管上司每於本任地方官外多派候補人員前往各屬名爲

勸諭捐輸實則藉端擾累甚至陵虐捐生婪索供給種種弊端多
由此起向來州縣徵解錢糧原有委員督催之事至捐輸既非正
項可比又無一定數目該委員等未能深知本地民情多一人干
預卽多一層煩擾實屬無益有損嗣後各省辦理捐輸著該督撫
專責本任州縣會同該地方公正紳耆妥爲勸導儻有不肖官紳
苛派把持營私舞弊一經查出卽行從嚴參辦概不准任意添派
委員致滋流弊將此通諭知之○諭軍機大臣等昨因揚州克復
德興阿收集兵勇已有萬餘諭令邵燦庚長如兵力不敷卽於揚
營分撥並諭該漕督等儻傳振邦帶兵來浦卽暫畱助勦俟逆氛
稍遠再回徐州本日據袁甲三奏徐營將領乏人傳振邦未能抽
身見在揚州已復江北軍務稍有轉機該總兵仍畱徐宿尙屬可
行所有山東調赴清江之兵勇一千名係定順桂林管帶見據邵

燦等奏睢甯宿遷捻氛復熾擬令此項兵勇先往該處剿匪自係移緩就急卽著邵燦等妥爲調度儻西路匪蹤已遠而清淮尙形喫緊再行調赴清江協同防剿如兩路均已稍鬆則山東本省兵力亦尙不敷此項兵勇仍著飭回本省不得調往他處袁甲三請調西甯鎮兵甘肅見無可撥已諭知官文飭催前調唐訓方張萬祿等所帶兵勇迅赴宿州矣將此由六百里各諭令知之○諭前據官文奏遵旨派令遊擊張萬祿帶兵一千糧道唐訓方帶勇三千繞道馳赴袁甲三軍營協同剿辦本日據袁甲三奏捻匪分路北擾雖擊敗回竄而各路喫緊兵力甚單不敷防剿附近各省又屬無可抽調需兵情形實爲緊迫著官文迅卽飭令張萬祿唐訓方統帶前項兵勇星馳前進繞赴袁甲三軍營以資助剿張萬祿見在他處一時未能卽往卽著將派令張萬祿管帶之鄖陽鎮兵

一千名併交唐訓方管帶馳往該處協同剿辦毋稍延緩將此由六百里諭令知之○諭袁甲三奏擒匪勢益猖獗恐其率眾西趨請飭豫省嚴密布置等語前據瑛榮奏毫東匪徒與蒙宿懷鳳各股聯絡意圖西竄飭令弁兵認真堵剿是豫省邊防業經該撫籌及惟見據袁甲三奏稱山套地方輜糧極多自被焚掠以後賊勢益熾凡附近徐宿居民均有散給旗幟倡入黨之事是匪勢竄形猖獗袁甲三兵力惟能嚴扼北路設匪徒悉眾西趨則歸陳均形喫重著瑛榮卽飭前經派出之趙書升蘇克金等於東路各要隘嚴密扼守毋任完善之區復遭蹂躪仍須以剿爲防隨時探明賊蹤相機進擊不得株守一隅致賊匪肆行撲擾至該撫前請飭總兵楊昌泗赴豫已據曾望顏奏稱咨令該總兵酌帶精兵一千名或數百名剋日啟程惟到豫恐尙須時日並著瑛榮一面催提

一面仍就見有弁兵安爲調撥毋稍貽誤將此由六百里諭令知之○袁甲三奏通籌江北大局請添派大員督帶重兵扼要駐紮以固北路藩籬得旨汝思此時有何大員可派不過欲將東豫邊防盡歸汝調遣必致各撫臣紛紛請旨朕總握大局實不能爲爾等排解也汝自樞廷忤歷京堂軍營數載一切居心之處朕已深悉○丁酉諭內閣德興阿奏官軍收復儀徵縣城一摺提督張國樑克復揚州後卽督率各軍拔營前進成明富明阿毛三元先後馳抵儀徵縣屬茅家橋地方該逆聞風驚懼東北兩門賊壘全撤入城張國樑飭令總兵李若珠等率領兵勇由東門北門直入並親督大隊繼進該逆望見我軍旗幟紛紛逃竄各軍奮力疾追乘勢擁入斃賊數百名轟斃淹斃賊匪甚多奪獲槍礮器械無算救出難民千餘名遂於十七日將儀徵縣城收復張國樑援剿江北

所向克捷實屬奮勇可嘉著卽乘勝將六合等處賊匪一律掃除
迅速奏功待膺懋賞○諭軍機大臣等前因天長竄匪直撲三河
集經勝保截剿大獲勝仗曾諭該大臣乘勝進攻速克縣城本日
德興阿奏張國樑等於十七日攻克儀徵見圖力解六合城圍及
布置高郵湖面情形一摺張國樑於十五日克復揚州十七日卽
赴儀徵賊匪望風披靡不難立解六合之圍惟天長一縣悍賊麇
聚其中勝保昨在三河獲勝幸有蔣壩防兵夾擊不令竄至清淮
今勝保自必遵旨進攻天長惟兵力尙單著通籌酌調以期迅速
奏功至克復後敗竄之賊如遁入洪澤湖中則清淮以下必受其
害邵燦庚長等所派兵勇雖曾獲勝爲數不多該大臣務當撥兵
進剿勿令天長逆匪由湖東趨是爲要著將此由六百里諭令知
之○予江南陣亡參將陳昇等祭葬世職○戊戌諭軍機大臣等

本日據勝保奏據六合潰勇傳說縣城失陷溫紹原尙無下落等語覽奏實深憤懣張國樑於十七日收復儀徵即可力解六合之圍乃據勝保傳聞該縣於十八日寅刻失守其時大兵自尙未趕到候補道溫紹原守城數載保全甚大茲以力竭被陷著德興阿等卽查明該員如何下落並確查失守情形詳細具奏儀揚雖經克復而六合被陷與天長江浦之賊勢成聯絡於江北大局頗有關繫張國樑諒已督兵進剿著卽乘賊蹤未定奮力攻擊迅拔堅城本日據胡興仁奏周天培已赴延平副將朱承先等管帶兵勇一千七百餘名徑赴揚州副將陶茂森等所帶湖南兵勇一千二百名亦日內可到著德興阿等俟此項兵勇到揚卽行飭赴張國樑軍營以厚兵力德興阿鞠殿華仍當嚴扼揚城及邵伯要隘毋令賊蹤北竄將此由六百里各諭令知之○諭胡興仁奏賊竄發

源延援祁門石埭攻勦疊勝一摺此次竄賊先由華埠窺伺婺源方經官軍擊退遽有另股從德興撲陷縣城其竄踞景德鎮之賊分擾祁門不能逞志遂復合青陽悍賊糾竄石埭疊犯崇覺寺黃土嶺等處賴張芾先期布置江長貴策應迅速不至內犯祁門練勇太平民團復能用命助勦俾祁石兩防得就肅清惟婺源尙爲賊踞胡興仁奏周天受見自閩浙率得勝之師於本月初二日回徽與張芾面商防勦機宜於青陽祁門黟縣一帶均各添兵助防周天受亦已督率親軍由上溪口前進著胡興仁張芾迅飭各軍一面迅圖克復婺源毋令久踞一面嚴防該匪回竄祁門石埭等處以期全境均臻靜謐將此由六百里各諭令知之○以託病規避革湖北提督德安巴圖魯名號拔花翎○己亥諭軍機大臣等昨據勝保奏六合失守當諭張國樸督兵進攻本日據德興阿奏

接准張國樑函稱十九日帶兵馳往陳板橋十八日六合縣城已被地雷轟陷並稱溧水縣城亦是日失守已帶兵渡江南去等語張國樑援剿江北連克儀揚滿擬迅解六合之圍而該城於大兵未到之先業經被陷該提督因溧水失守折回南岸自係先其所急溧水逼近高淳東壩及鎮江一帶處處可虞和春張國樑務當體察賊情妥爲布置此時江南江北賊勢鴟張情形俱屬喫緊張國樑畱兵二三千名協防北岸尙恐不敷攻剿胡興仁前奏副將朱承先等管帶之兵勇一千七百餘名副將陶茂森等所帶湖南兵勇一千二百名曾諭德興阿飭赴張國樑軍營見在該提督已赴江南此項兵勇仍令馳赴揚州由德興阿派員管帶與張國樑畱下之兵同攻六合毋庸截畱並已諭知德興阿矣將此由六百里加緊諭令知之○諭自張國樑帶兵渡江連克儀揚方冀卽

解六合城圍昨據勝保奏六合潰勇傳說縣城失陷曾諭德興阿等確查情形具奏本日該大臣奏六合不守兵民所供略同並有溧水復陷張國樑已渡江南去各情覽奏更深憤懣六合孤城困守日久德興阿等潰師不振節節退守未曾撥兵救援及至張國樑趕到勢已無及今張國樑既因南岸緊急馳回應援並酌留兵勇二三千名協守北岸總兵成明既隨同張國樑往援六合卽當督同兵勇會合張國樑留下之兵進攻六合何以德興阿轉令帶隊回揚勝保因天長被賊竄踞親赴盱眙扼截曾於三河集等處剿敗蔣壩竄匪昨已飭令迅擣天長以顧北路並據奏已派德安帶兵援六合矣德興阿等挫敗後株守邵伯今復調回成明又欲將張國樑所留兵二三千名防守瓜州置六合於不問實屬一籌莫展昨據胡興仁奏周天培遠在延平未能卽到已派朱承先等

帶兵勇一千七百餘名到杭卽日前赴揚州其陶茂森等所帶兵勇一千二百名亦日內可到此項兵勇本諭德興阿飭赴張國樑軍營今該提督已回至江南所有朱承先等兵勇到揚著德興阿等仍令成明帶往六合與張國樑所畱兵勇會合將六合逆匪迅速剿除以圖克復稍贖前愆如揚州兵力尙單可將成明前次帶往之兵酌畱一半交德興阿布置毛三元見在萬福橋六開兩處往來防禦卽可責令兼顧瓜州若瓜揚等處再有疏虞恐德興阿等不能當此重咎至南岸鎮江等處已諭和春調度設防矣將此由六百里加緊諭令知之○辛丑諭軍機大臣等昨因張國樑帶兵渡江南去諭令德興阿仍飭成明會合張國樑所畱兵勇進攻六合原因儀揚甫經收復必須前路有兵截剿庶可杜其紛竄若但知遠避邵伯一籌莫展不知振作則賊勢方張何處不可竄越

見在鞠殿華駐守揚州成明帶兵會同張國樑畱下之兵進攻前路使賊不敢再向東竄則儀揚可保加以浙江撥回朱承先等所帶之兵勇二千九百名如果振刷精神申明紀律未嘗不可轉敗爲功以贖前愆儻仍毫無布置則六合大股賊匪必致仍擾儀揚德興阿等自問當得何罪至天長一路雖有勝保督兵進剿西北甘泉山一帶地接天長亦應嚴防竄匪鞠殿華成明毛三元均係幫辦大員亦應力圖振作儻布置未周再有疏失朕惟有執法從事將德興阿等重治其罪懍之愼之將此由六百里加緊諭令知之○諭前據勝保奏卽由盱眙進攻天長當經諭令嚴防該匪竄入洪澤湖中以保揚州後路諒該大臣必能遵旨籌辦昨據德興阿等奏溧水失守張國樑已帶兵渡江僅畱兵二三千名協守北岸已諭德興阿等仍令成明帶兵會同張國樑畱下之兵進攻六

合矣惟德興阿自遭挫敗不能振作雖經撥兵分扼各隘而潰敗之兵恐不足恃見在揚州後路如清淮高寶均屬空虛儻天長賊匪由湖東趨必致蹂躪腹地雖有邵燦庚長派防兵勇亦恐力難堵遏勝保既攻克天長務須趣賊仍歸來路勿令由湖竄擾高寶清淮等處方可維持北岸大局著勝保妥爲兼顧並將攻剿情形迅速馳奏以慰廑念將此由六百里加緊諭令知之○和春奏湖北宜昌鎮總兵虎嵩林奉派駐守溧城該處近接小丹陽博望等處當逆眾聲言內犯屢經嚴飭該鎮加意防維如能堅守待援何至逆氛闌入乃遇賊卽潰以致失陷城池實屬大誤事機迄今四日之久始據稟稱退至溧陽縣城殊出情理之外似此恇怯無能自應嚴行參辦惟念其子虎坤元戰功屢著臨陣捐軀尙可稍從末減相應請旨將總兵虎嵩林卽行革職永不敘用以爲臨敵退

縮者戒得旨虎嵩林著革職永不敘用○和春奏據虎嵩林稟報

小丹陽之賊大股竄至紅藍埠參將馬騰超失利該逆旋撲縣城

適鄭魁士派副將蔣錫光帶勇到溧水合力擊回無如賊悍兵單

臣派總兵張玉良管帶馬步三千名星馳援應乃該逆已於九月

十八日酉刻分股鈔撲虎嵩林等眾寡不敵竟被闖入縣城四面

紮營聲言分竄溧水北至金壇東南至溧陽均不及百里與高淳

東壩相爲唇齒又係大營後路藩籬當於無可抽調中添撥兵勇

二千由張玉良統帶趁該逆立腳未定直擣其巢迅圖克復並檄

鄭魁士由高淳倍道前進兩路夾攻以期得手惟是臣營馬步將

領兵勇屢經派赴江北福建實已單薄張國樑酌畱兵勇卽於二

十二日督同總兵李若珠先後帶隊回營臣等面商見在溧水一

城甫經賊踞必須趁其守具未備一鼓驅除方免滋擾因添派總

兵馮子材帶兵三千會同張玉良由湖墅進兵迅圖攻復仍派總兵戴文英帶兵三千駐守秣陵關以顧大營後路此時西南各路營盤最爲喫重均由張國樑督率李若珠等相機堵禦以壯聲威報聞○壬寅諭軍機大臣等僧格林沁慶祺奏遵議提督改駐海口並酌議加價抽釐等章程開單呈覽一摺直隸提督駐紮處所未容遽議更張而海口復設水師亟資整理據僧格林沁等請令該提督於每年二月改駐大沽至十月仍回古北口自可於營務海防兩有裨益惟見在時令已交十月而海口善後事宜尙未告蒧該提督自不能遠離津郡著俟督辦礮臺等工完竣再行奏請來年卽照所定章程按期來往俾資兼顧至所議鹽斤加價及設局抽釐各事宜均著照議辦理其添設將弁等事仍著勘議明確隨時具奏將此諭令知之○曾國藩奏臣行抵雙港節據探報閩

賊大股三萬餘人回竄新城道員劉長佑扼守隘口連日苦戰雖
疊獲勝仗而該逆愈來愈多更番猛撲又吉安城中八月初十日
夜乘大陣衝出追殺未盡之賊尙餘數百人沿途裹脅復聚至千
餘人連陷崇仁宜黃兩縣撫建各屬處處戒嚴臣以撫建兩城收
復未久民心易於動搖劉長佑一軍兵力本不甚厚其分防瀘溪
各營曾於八月失利堵禦閩賊大股已慮難以支持復聞崇宜之
警尤恐軍心不固民間喧傳石逆全股希圖回竄南城等縣飛書
請援張運蘭亦稟請先救新城遂令張運蘭率所部兼程馳進臣
亦改道南行回顧建昌途次接奉八月十四日諭旨知石逆窺伺
撫建之說早已上達 宸聽 聖天子明見萬里無微不照臣督
隊趨行馳抵金谿聞劉長佑大獲勝仗自八月十五至九月初五
等日竭力痛剿殲擒之賊不下二萬人餘匪仍由建甯一帶竄去

接見各團紳民無不稱爲奇捷見在建昌肅清崇仁宜黃之賊亦
由南豐竄入閩境臣抵建昌後擬將撫建甯都各府州防剿事宜
咨商江西撫臣妥爲布置卽率師由杉關入閩至劉長佑堵剿獲
勝情形應由耆齡奏報報聞